

**Dewan Pemuda PAS Pusat Sokong Penuh Nik Aziz Laksana Hudud
mStar Online
September 24, 2011
Oleh NURUL AIN MOHD HUSSAIN**

PETALING JAYA: Dewan Pemuda PAS pusat pada Jumaat menyatakan sokongan tidak berbelah bahagi mereka kepada keputusan Menteri Besar Kelantan, Datuk Seri Nik Aziz Nik Mat untuk melaksanakan hukum hudud di negeri tersebut.

Ketuanya, Nasrudin Hassan Tantawi berkata, apa yang disuarakan oleh Nik Aziz itu memperlihatkan sikap yang konsisten dalam isu pelaksanaan hukum hudud.

"Saya kagum dan menyokong kenyataan Nik Aziz yang konsisten dengan pendirian dan prinsip perjuangan Islam yang didokongnya.

"Sebetulnya ini adalah satu istiqamah (ketaatan) yang dituntut keatas semua pemimpin Islam. Maka saya tidak nampak sebarang isu atau polemik di situ melainkan musim pilihanraya telah tiba (bagi mereka yang membesar-besarkan isu ini)," katanya.

Justeru, Narudin menyeru supaya perbahasan mengenai pelaksanaan hukum hudud di media massa segera dihentikan.

"Perbahasan mengenai hudud tidak selayaknya di media kerana ia bukan isu politik untuk dipolemikkan.

"Ia adalah ilmu dan syariat yang mempunyai kaedah, usul dan fekah yang perlu dipelajari dengan jujur, difahami dengan halus, diamal dengan telus dan dihayati dengan tekun," katanya.

Jelas beliau lagi, perbahasan dan pengkajian mengenai hudud mesti melalui seminar kefahaman yang berterusan, pengajian khusus di pusat pengajian Islam seperti universiti, madrasah, masjid, usrah, forum, diskusi, wacana, mahupun dialog yang dilakukan secara berterusan.

Namun begitu beliau turut mengaitkan kontroversi yang dibangkitkan mengenai pelaksanaan hudud ini ada kena mengena dengan pilihan raya umum.

"Tidak ada petir, tidak ada guruh, tiba - tiba isu pelaksanaan hukum hudud timbul kembali. Pada pandangan saya, apabila timbul isu pelaksanaan hukum hudud maka ia menandakan musim pilihanraya semakin hampir," katanya ketika dihubungi mStar Online pada Jumaat.

Hakcipta Terpelihara © 1995-2011 Star Publications (Malaysia) Bhd

Source:

http://www.mstar.com.my/berita/cerita.asp?file=/2011/9/24/mstar_berita/20110923203419&sec=mstar_berita